

衛生家寶產科備要

衛生家寶產科備要卷第五

產科雜方

催生如聖散此壹方廬江劉寶助教
經効名方

黃蜀葵花不拘多少

右壹味焙乾爲細末每服貳錢熟湯
放溫調下神妙或有漏血胎臟乾澁
難產痛劇者併進參服良久腹中氣
寬胎滑即時產下如無花只用黃蜀

葵子爛研小半合以酒調瀉去滓溫
飲尤佳

救生散安胎益氣易產

人參

去蘆切片

訶子

濕紙果煨熟去核

白朮

剉炒黃

陳橘皮

去白炒

大麥蘖

炒黃

神麴

細剉炒黃色

各半兩

右爲細末每服貳錢水壹盞煎陸分
溫服入月加壹倍用水貳盞煎壹盞
溫溫空心服之能令兒緊小乳母無患

○單胎散治婦人妊娠傷寒遍身大熱
悶亂躁渴痰甚則蒸損胎臟廬江劉寶
助教名方

捲荷葉壹兩

嫩者焙乾秤

蚌粉花半兩

好細白者秤

右爲細末入粉研勻每服貳錢以新
汲水用蜜調下日進兩服

○二聖散產前安胎產後治惡血不盡及
胎衣不下

羌活

洗去苗剉

川芎

洗剉

右等分爲細末每服貳大錢酒少許

水柒分煎柒沸溫服

羌活散治姙娠患時疾

羌活

去苗剉碎

荆芥穗

不見火熬

赤茯苓

去皮剉碎

川芎

洗剉焙

宣州乾葛

剉焙

陳皮

去穰剉

甘草

炙剉

川升麻

剉

各壹兩

右爲細末每服參錢水壹盞半入生

薑伍片薄荷拾葉同煎至壹盞稍熱服不以時候

黃金散治姙娠患時疾

黃芩

尖如錐者

鬱金

剉

各壹兩

右為末每服壹錢板藍根地黃水調下汗出効未得汗再服即瘥又用鷄卵墜并至泥隔宿取出吞之必無虞矣薑粉散纔產服此藥蕩盡兒枕除百

病源

當歸

洗去蘆
須切焙

官桂

去皮不
見火

人參

去蘆
切片

茯苓

白者去
黑皮

甘草

炙

芍藥

洗淨

知母

潤者
切炒

川芎

洗

大黃

略炒

黃耆

蜜炙

木香

不見
火

草豆蔻

去殼

白朮

剉焙

訶子

煨熟
去核

高良薑

剉炒

青橘皮

去穢

熟乾地黄

洗酒
浸焙

右除地黃外各等分剉焙乾次用附子壹箇結實半兩者炮裂去皮臍切生薑壹斤研取自然汁於碗器中停留壹食久傾去清汁取下面粉脚攤在蒟葉中入焙籠焙乾同衆藥擣羅爲末纔產後用藥末參錢水壹盞薑參片棗子壹箇擘開同煎至柒分乘熱喫如喫藥之後自然產母睡着半日以來睡覺再服全除却腹痛壹日

只可參服至致服不可服恐肚中冷也

香蓮散治產後咳逆

石蓮拾箇炒熟丁香拾箇

右為末用水參合煎拾沸溫服

地黃散治產後血痛如刀刺

熟乾地黃洗酒浸焙橘皮去白剉焙

右件等分為末每服壹錢粥飲調下

尋常痛發可常服

香脂散治產後吐逆不止

狗膽壹箇

硃砂

丁香

五靈脂各少許

右爲末以狗膽圓如白豆大每服壹圓生薑水磨下

血竭散治產後百疾廬江劉寶助教名方

血竭

沒藥

剪碎

右等分輕手研細頻羅再研取盡爲度每服貳錢用小便合和細酒半大

盞煎壹貳沸溫調下纔產下壹服上
床良久再服其惡血自循下行更不
衝上免生百疾

產後發熱名曰褥勞用猪腰子作粥治之
猪腰子壹隻去白膜薄切作柳葉片子
少鹽酒拌之先用粳米壹合入葱椒煮
粥鹽醋調和將腰子鋪碗底用熱粥蓋
之如作盦生粥狀喫之每日空心做喫
極妙

十八論中治產前後患蒲黃黑神
散功效

第一產因熱疾胎死腹中胎死身即冷
口角沫出爪甲青黑色四肢逆冷但
服此藥煖其死胎須臾自出

第二難產或橫生逆生胎衣不下此藥
並治

第三產後衣不下但服此藥逐出衣中
血遂自出如衣帶斷亦同

第四血暈醫人不識呼爲暗風但服此藥立瘥

第五口乾心悶醫人呼爲膏膈不利此名血結但服此藥立瘥

第六乍寒乍熱醫人不識呼爲瘥疾但服此藥立瘥

第七產後四肢虛腫醫人不識呼爲水氣蓋血氣隔四肢寒但先服此藥立瘥後服轉藥瀉了惡物轉藥謂之黑

神圓

第八產後乍見神鬼醫人不識呼爲風邪但服此藥即瘥

第九產後月內不語但服此藥即瘥

第十產後腹痛兼瀉痢急服此藥後服

調中湯

調中湯是止瀉石
灰散出產乳經中

第十一產後遍身疼痛但服此藥瘥

第十二產後小便出血大便秘澀人多作五淋治不愈但服此藥瘥

第十三產後血崩謂惡露未盡久不治
之及食鹹酸所致若腹似痛時稍難
治肝家熱背筋急急服此藥後服黑
神圓瘥

第十四產後血氣不通上氣喘嗽多睡
謂滿月後月脉未通食熱麵壅結成
疾或有氣塊發時衝心心痛氣急咳
嗽四肢無力乍汗出心痛月候不來
名曰敗癥腹痛遶臍面赤宜服此藥

即瘥

第十五產後心腹脹滿嘔逆不定醫呼
爲翻胃不愈急服此藥吐出胃中惡
物即瘥

第十六產後口鼻黑色氣起及鼻衄
不治

第十七產後喉中氣急喘不治

第十八產後中風爲無故下床百日之內
傷房室或因著灸有驚臟腑中風之

時眼澁腰背筋急角弓反張牙關閉
定不可治也

蒲黃黑神散方已見第一論末
黑神圓方已見第十二論末

產前後十八論烏金散

婦人萬病皆因血氣而生就中產後乖
違誠難救療百日之內變證尤多或坐
即運絕卧即口乾經日多言還應心悶
或傷熱食變作崩中飲冷服涼梗成腰

痛敗血入腹則脅脹虛鳴惡露上衝乃
成嘔逆脾之受血發則傷寒肝氣有邪
即多嗔怒肺之被撓氣悶喘麤胃藏未
安多爲腹脹敗血流走百節酸疼留滯
四肢皮膚俱腫失音不語還因敗血入
心散爲淋瀝亦是血之入腹大抵虛弱
積血所爲三焦不調衆疾皆起每尋方
卷多不會解就中產前產後之圖難全
真訣當貧困之輩或居村中念其急難

方當思慮覓勞神悶不知所裁忽見人形兒非常乃言曰余有秘術子其知乎不覺惕然瞻敬之際復曰子請存於誠信心欲救人事當甚喜吾有產後一術名曰烏金方受於子宜保惜之余即跪受要旨頓覺精神爽易事理照覺在寤中神授乃依方修合並誥神願遂成產後十八方如後

第一論問胎死腹中者何

荅曰緣母患染熱疾經六七日間臟腑極熱薰薰其胎是以子死何以知之身死便冷不居子宮乃墜臍下冷痛口角沫出腹冷爪甲青四肢逆冷命在須臾但以此三服令胎熱須臾自下

第二論問產難者何

荅曰兒已成形每食母之血候十月當足月血有餘乃結成塊俗呼爲覓

枕子欲生時兒枕先破爲敗血散裹
子身上固當難產但服此散三服敗
血即散須臾自產或逆產其躰不同
悉皆治之

第三論問胎衣不下者何

荅曰產訖敗血流入胞衣中被血脹
固當難下但服此散衣中血散須臾
自出若胞衣帶斷亦宜服此散即下
第四論問血暈產後三日起止不得眼

前自見鬼神或悶絕不識人者何

荅曰產後三日血氣未安運走五臟奔於肺上時人不識呼爲暗風以此治之萬無一瘥但服此藥立可安瘥

第五論問口乾心悶及煩渴者何

荅曰產後七日以來血氣未定蓋爲食於熱麵與血結在心即渴時人呼爲膏膈壅悶若以此治萬無一瘥但服此散立瘥

第六論問產後乍寒乍熱及渴者何
荅曰產後虛羸敗血入於肺則熱入
於脾則寒乃渴時人不識呼爲瘧疾
若以此治萬無一痊服此散立瘥

第七論問產後四肢浮腫及寒熱者何
荅曰敗血流入五臟將滿即四肢停
留日久却還不得乃欲爲腫時人不
識呼爲水腫且如水腫與血腫不同
何以明之水氣喘而小便澁血氣渴

而四肢寒先服此散次服宣元瀉下
惡物自瘥宣元是黑神圓

第八論問言語顛狂無度若見鬼神或
寒熱及渴者何

荅曰產後敗血衝心心不受邪觸被
敗血薰薰心悶薰熱煩渴至躁言語
顛狂時人不識以爲風及神邪所致
若以此治之萬無一痊但服此散愈
第九論問產後不語者何

卷五
十二
答曰夫人心有七孔三毛產後敗血上行流入心孔之中被血閉之即使不語時人不先去心孔敗血其病不除但服此藥當漸語也

第十論問產後腹痛及痢者何

答曰產後未滿月間誤飲冷水水與血相和流入大腸大腸受之血遂成痛水穀不化或泄或脹膿血不定急服此散次服調中湯立効

第十一論問產後遍身疼痛者何

荅曰產後百節開張敗血流入四肢
留滯日久不散結聚虛脹是致疼痛
但服此散逐去百節間敗血須臾自定
第十二論問產後瘀血及小便赤澁大
腸痛者何

荅曰敗血流入小腸閉却水道即小
便艱澁流入大腸閉却肛門是致大
小便俱難醫人不識呼爲五淋治之

萬無一痊但服此散次服黑神圓聚結

物出其病立愈

或用洪氏方中排膿
內補散依方服立効

第十三論問產後崩中者何

荅曰敗血惡露未止日久或食鹹酸
之物遂變崩中血結變黑狀似鷄肝
或時寒熱背膊拘急煩悶名曰崩中
宜先服此散次服黑神圓即安

第十四論問產後血氣不調道路閉塞
兼咳嗽多驚者何

荅曰產後滿月後月經未還不能謹
忌好食熱麵遂即成疾積聚結塊發
即氣急咳嗽四肢寒熱心悶口乾背
膊拘急煩躁夜夢驚悸體全無力
多汗心疼月經不來名爲血癥腹痛
多睡面色多赤因茲不療遂成骨蒸
治須子細看此疾狀或服別藥十無
一應終不得瘥只服此藥其患自退

第十五論問腹肚脹滿吐逆者何

產後敗血傳於脾胃之間氣遂
相衝不定即留滯嘔噦膏脇俱脹時
人不識呼爲翻胃以此治之萬無一存
急服此藥吐出胃中惡物即便喫粥
第十六論問產後口鼻黑色及鼻衄
者何

荅曰敗血傳入臟腑臟腑既滿衝於
頭面却還不得焦乾白黑見於面色
衝於鼻即鼻衄黑起緣產後虛熱

甚變成此狀若別治之萬不得一此名
心肺敗血宜服此藥

第十七論問產後喘急喉中如猫兒聲
者何

荅曰敗血衝入心肺氣與血併遂結
爲塊入於喉中如有此狀急服此藥

第十八論問產後中風兼有黑血點者何
荅曰產後七日內下床衝風百日內傷
房勞或有灸瘡中風取性慢易即中

風也初中之狀氣澁腰痛筋急如角
弓反張牙關緊急若有此狀即是風
邪所入或面色黑遍身赤黑敗血流
入臟腑臟腑皆滿流入皮膚退反不
得變成血點或得此變急服此藥無
有不瘥

宣經圓

巴豆拾伍粒

去皮心膜用生絹袋
子盛以灰汁煮十餘

沸取出研紙
壓油了重研

右件先用烏金散參錢以無灰酒調似糖入甕瓶中於重湯內熬成膏入巴豆末同和為圓如菜豆大熟水下拾伍圓宣了冷粥補之忌毒物

烏金散

頭髮灰

男子者不須洗燒灰

鯉魚鱗

燒灰

當歸

焙去蘆須

延胡索

生用

好墨

煨過

肉桂

不見火去麋皮

麒麟竭

赤芍藥

剉

百草霜

是銅底刮下者煤

右件玖味等分杵羅爲末每服貳錢
溫酒調下又用童子小便半盞生薑
壹塊同煎調下入麝香少許更妙

產前所忌藥物盧醫周鼎集以爲歌

蚬斑水蛭地膽蟲 烏頭附子配天雄

躑躅野葛螻蛄類 烏喙側子及蜚蟲

牛黃水銀并巴豆 大戟蛇退共蜈蚣

牛膝藜蘆加意戒 金石錫粉對雌雄

牙朴芒硝牡丹桂 蜥蜴飛生更麝蟲
代赭蚱蟬胡粉麝 芫花薇銜草三稜
槐子牽牛并皂角 桃子蟻螬和茅根
欖根硃砂與乾漆 亭長溲䟽茵草中
瞿麥藺茹蟹爪甲 蝟皮鬼箭赤頭紅
馬刀石鱉衣魚等 半夏天南通草同
乾薑蒜鷄及鴨子 驢馬兔肉不須供
切忌婦人產前用 此歌宜記在心宵

衛生家寶產科備要卷第五

衛生家寶產科備要卷第六

備產濟用方序

婦人產褥之事亦有蹉跌爲害不細若因而受疾又非尋常疾病之比氣血既虛更難攻治是宜昔人所留意而不敢忽者也予性喜方藥偶得產方甚多蓋嘗用以取効焉今錄其所得之方及平時所聞之說與夫疾證用藥次第共爲一書以濟人之急難初虞世嘗謂婦人

生產須使之自能通曉方爲盡善斯乃至論然間有素無產難之家不知出於偶然心常易之不以介意故緩急之際至於產婦已困而家人未悟者徃徃有之此幸其無事則可非萬全之道也紹興庚申重陽日三吳外士餘杭虞洸書虞氏備產濟用方

妊娠

婦人妊娠之後或觸冒風冷或飲食不

節或居處失宜或勞動過當少有不和則令胎動不安重者遂致傷墮臨產之際爲患不小豈可不戒也

妊娠三箇月後或疑非胎宜服川芎散
妊娠五箇月後宜服滑胎枳殼湯

八月

八月第一日清旦先書借地法貼產婦房內北壁上須清心志誠書之更須避日遊月支諸神等

入月後每日進保生圓一服臨產五臟
不痛其子易生

凡產閣及藏衣之地並須依方位所利
鋪設產閣務要清虛仍須遮塞孔隙無
令賊風遊氣可得而入及窻壁仰泥之
類並須一一經心照管恐有顛覆種種
非意爲害不小入月後須便擇好日爲
之倉卒之際無緣周備也

凡合用湯藥須於未產前一月內修合

足備不可倉卒或市諸藥肆或求之醫
篋產後五臟皆虛藥貴精當恐有雜偽
反致他疾產婦服食貴在誠潔老娘須
擇溫善安詳慣熟之人其妄誕揮霍無
常者去之又有喜驚動人而收已功者
爲害尤甚不可不知也大抵有孕婦之
家選擇老娘最爲先務旣得之則令與
產婦游處情熟入月則令守月不可臨
時倉卒呼喚却致誤事又老娘收生風

俗多有不同閑時宜先令詳說次第或有未便款曲與之商量不可一切任之此若選擇得人則上下安心產婦亦免憂疑省力萬倍腰生只用家中慣熟妮子爲佳若用外人亦須先審問次第然後用之亦能爲害不可不謹也

臨產

產婦覺腹痛他人切不可驚忙及亂報人知只可令一兩人老成親熟人安慰

相伴亦不得用人多不然則令產婦憂
怕氣血錯亂生理不和而起百疾

產婦腹痛時須低心忍耐不可急性燥
怒起動揮霍皆能令子失道遂致難產
產婦若只腹痛者未產若連腰痛甚者
即產候也

產婦腹痛雖甚且須令人扶持徐徐不
住行動若倦亦且扶立時時令行先脫
產婦常着衣服一件覆竈頭上待子逼

生方得蹲坐切不可蹲坐太早太早則
子在腹中轉動不得遂致難產產婦臨
產須避太歲所在不得面對太歲蹲坐
恐致憂禍深戒深戒產婦蹲坐時須要
四體平正不得稍有偃曲及強嘔氣用
力亦能令子失道致難產也

產婦未蹲坐時先須用五積散肆錢加
順元散貳錢同煎分作兩服用湯煖却
不得令冷候蹲坐時令產婦先進一服

如稍覺產遲即再進一服若一服後便
產即不須再服此藥助氣催生他藥所
不及吾鄉所謂沈家五積散者是也方
出沈存中內翰宅昔有貨者三百一服
号爲神藥余家每用之取効但性稍熱
產婦素協熱者服之產後臟腑須微覺
燥澁甚者三兩日不通切不可用利性
藥但調和粥食如後說調養津液生則
自然流利也

說在產後諸
證用藥門

產後

纔分挽便須急與產婦童子小便一盞
溫服次進勝金湯一服不可飲酒過量
緣酒能引血入四肢作病兼新產後臟
腑虛熱酒入腹中必致昏亂又嘗有人
用醋墨此雖破血有功然亦傷肺服多
則因而成嗽余見蜀醫張宗說說有用
醋墨者下咽疾作此是氣血方虛酸勝
而生痰不可不戒才分挽便須燒磚石

或炭投醋中三日內嘗令聞猛醋煙氣以防血暈又不得令熟睡須頻頻喚醒緣氣血全虛恐生昏亂分晝後不得便睡且須扶坐移時方可以軟物自腰以上漸漸撐起及高枕起頭項仍須令仰卧立起膝時復令人從心上用手按到臍下如此一日已來方可止恐惡血上行而致暈也兼須加意遮避賊風不可不謹

產後所進粥藥不得犯生水以至碗器之類並須用沸湯洗火灸乾方可用產後七日內唯須頻進童子小便及時進白粥如小便難喫則依法漬之自然易喫也七日後方可進少醇酒并些小燒鹽不可用生鹽二七日後漸進些小淡煮極麋爛膾肉三七日後漸食滋味一月後漸進麵食一百日後方可食果實生冷等物產後五臟百脉率皆傷動一

百日後方始如舊常人不自愛惜才到
滿月便稱平復或不謹飲食或觸冒風
冷或喜怒高聲或勞動用力氣血未定
情慾不常此皆致病之由也婦人稟受
虛實皆緣生產而能移易若能一一如
法將息補養則有平生虛怯多病而遂
盛實無病者若不能如法將息補養則
有平生盛實無病而遂致虛損瘦瘠成
纏綿不可起之疾者當時不覺意謂不

然及歲月成疾又不能推究其由乃謂
偶爾故婦人產後徃徃不能加意將攝
噫臨產之際死生所繫及產難既過漸
向平復而又不能將息以自保攝遂取
困厄豈不至愚哉世之任意輕動不能
調養者多故詳言之

產後諸證用藥例

產後惡露或多或少皆能令人暈悶心
煩滿急

產後惡血攻心則能令人眼生黑花心
悶欲絕產後才覺惡心頭旋頭昏多涕
唾身如在舟車中此是血暈之候也便
以猛醋煙燻及服保生園勝金湯百草
霜散等治血藥則如熟乾地黃生薑芸
臺子當歸蒲黃涼沒藥桂心延胡索赤
芍藥牡丹皮牛膝川芎麒麟竭之類
產後惡血攻心則荒言亂語驚怕或啼
或笑宜服金黃散麒麟竭散等破惡血

養好血藥則如琥珀熟乾地黃當歸蒲黃涼赤芍藥之類安心氣則如遠志茯神朱砂麝香之類

產後惡血不絕爲自來經血虛損或產時惡血出不盡留滯腹中先有宿冷遂成淋瀝不止宜服保生圓等如牡礪當歸熟乾地黃艾葉阿膠厚朴乾薑之類性冷藥不可服之

產後因惡物不下或下不盡心腹疼痛

煩悶宜服千金散地黃散桃仁散川芎
散勝金湯保生圓筆寸又宜服桂心當歸
牛膝牡丹皮虎杖澤莪莪延胡索赤芍
藥之類產後須常舁問產婦如所下惡
物多即不須再三進逐惡血藥恐氣血
益虛煩悶暈亂及生疾病如覺比尋常
少或不行則須急攻之緣血隨氣上行
掩於心故令煩悶而心滿急二者得失
甚大切在詳審產後大腸祕澀此是產

時走津液多腸胃未和乃常事也切不可亂服通利藥但只依尋常服調氣血藥及調粥食常令溫煖細軟依時漸進不得失飢亦勿傷飽氣血調和則腸胃自然平復矣

產後躰虛切不可妄進湯藥如別無證候但只與保生圓及調養氣血等藥

產後三日起坐不得眼見黑花目或暈絕全不見物者是血氣未安運走五臟

奔疰於肝故也有不識者呼爲暗風悞
矣宜服黑散子

產後乍寒乍熱及渴者是產後虛羸敗
血入心肺則熱入脾則寒不識者呼爲
瘡疾悞矣宜服黑散子

產後四肢浮腫及寒熱者是產後敗血
流入五臟五臟將滿流入四肢停留日
久却還不得乃化爲水有不識者呼爲
水氣悞矣血與水氣狀候不同何以明

之水氣喘而小便澁血氣濁而四肢沉
當細辯之宜服黑散子產後言語顛狂
乍見神鬼時復寒熱及渴者是產後敗
血衝心心不受觸旣被蒸燠心臟熱極
遂生此疾不識者呼爲風邪神祟悞矣
宜服黑散子

產後一臘非時不語者是敗血上衝陷
入心孔中旣被蔽之便致不語宜服黑
散子

產後遍身疼痛者是百節開張血疰結
處停留不散結聚虛脹是以疼痛宜服
黑散子骨間敗血即去

產後雖滿月血氣不通上氣咳嗽痰涎
多者經脉未還便不忌謹多食熱麵壅
結成疾聚即成塊散即上衝氣急咳嗽
四肢虛熱心悶口乾睡夢多驚四肢無
力盜汗心痛月候不調或成血癥環遶
臍下或即面赤因變骨蒸但多服黑散

子即瘥須急服之此疾難理故也

產後敗血停在脾胃食衝於胃胃衝於氣氣衝即不安便當吐啞膏脇俱脹有不識者呼爲翻胃但服黑散子吐出惡物即瘥

產後中風者是未經七天下床兼百日內傷房事或灸瘡內中風也初中之狀眼澁腰強筋急如角弓反張牙關緊急若此之狀非中風也有此疾者安能救

療婦人傷犯之後其疾甚多不可不戒
產後面色黑及遍身生黑靨子由敗血
入皮膚欲出流走熱結便住却還不得
遂成黑靨中此者百無一瘥

難產逆產橫產

難產逆產橫產三者皆能立致不測之
禍然所得多端或先因漏胎血去臟燥
或子臟宿挾疹疾或觸犯禁忌或產時
驚動穢露下早子道乾澁產婦疲困或

坐卧未安身體斜曲不正轉動忽遽強
嘔氣暴衝擊或腹有兒枕產時先破遂
爲敗血散裹其子胎中伏熱故致難產
也產時未至驚動太早子轉未覺使用
力產之故致逆產橫產也產婦面赤舌
青者子死母活面青舌赤沫出者母死
子活唇口青兩邊沫出者子母俱死身
更重而熱舌下脉青黑及胎上冷者子
已先死並有方治之在後

胎衣不下

產婦初時用力產子而體已疲憊不能更用力產胎經停之間外冷棄之則血道乾澁胎衣不下也子臍帶與胞系相連若不下即須急治之不然則斷臍稽遲子傷冷氣而成病矣舊方胞衣不下恐損子者須依法截臍胎衣不下者腹痛滿則殺人若倉卒無藥即多食猪脂亦佳

妊娠食忌

食兔肉令子缺唇

食雀肉令子盲

食羊肝令子多患

食鴨子令子倒生

食鱉肉令子項短

食驢肉令子過月

食乾薑蒜令胎不安

已上並妊娠五箇月之後則當忌食

入月借地法

東借十步西借十步南借十步北借十步上借十步下借十步此中產婦安居無所妨礙無所畏忌諸神擁護百鬼速

去急急如律令

十二月 月產 卧藏 衣吉 凶方 位圖

癸	未	丁	午	丙	巳	癸
申			南		辰	乙
庚						卯
酉	田			東		甲
辛						寅
戌			北			丑
亥	亥	壬	子	癸	丑	艮

正月

丙產
壬藏

二月

庚甲產
坤藏

三月

壬產
丙藏

四月

庚產
甲藏

五月

壬產
丙藏

六月

甲產
庚藏

七月

丙產
壬藏

八月

甲庚產
艮藏

九月

丙產
壬藏

十月

甲產
庚藏

十一月

壬產
巽藏

十二月

甲產
庚藏

產前諸方

川芎散

三箇月後疑
非胎即服

川芎壹兩生用

右爲細末空心濃煎艾湯調下貳錢
腹內微動者當有子也

枳殼湯

五箇月後服
滑胎易生

商州枳殼貳兩去穢炒石州甘草壹兩

右為細末每服貳錢百沸湯點空心

食前一日三服或四服唐胡陽公主

每產則經旬痛楚萬法不効服此藥

遂驗自服藥後忌登高厠此方神妙滑胎易產他藥

所不及但其胎緊小微帶黑色百日後
肉色方漸變白唯產婦素虛怯者更宜

斟酌緣枳殼性
寒恐難多服也

蟹爪湯

姙娠僵仆失據胎動轉上搶心
甚者血從口出逆不得息或注

下血胎不出則寒熨人腹中急如產狀虛
乏少氣困頓欲死煩悶反覆服藥母即得
卧下血亦止其
當產立生神效

產方六

蟹爪壹升約伍兩阿膠貳兩

劉碎勿炒

甘草

炙劉

桂心

不見火

各貳尺

右以東流水壹升煮取參分去滓內
膠洋盡能一服佳不能一服者食頃
再服若因急不能飲者灌之藥下子
母俱活子死則母活若不經僵仆下
血服此湯即止

又方

姙娠偶有所觸或墜高傷打致胎動不安腹中痛不可忍者可服

縮砂壹兩

和皮用淨熨斗於慢火上炒令熱透去皮只用仁

右為細末每服貳錢熱酒調下覺動

處熱即已安矣

又方

胎不穩坐卧不安可服

木賊草

去節

川芎

剉

各壹兩

右為細末每服壹錢水壹大盞入金銀

物同煎至陸分去滓空腹食前日三服

人參圓

婦人姙娠嘔吐不止名為阻病或以尋常治嘔吐藥治之非也

此宜服藥

乾薑

炮烈

半夏麴

炒

人參

去蘆切

各壹兩

右為細末薄糊圓如雞頭大每服壹圓米飲下可加至叁圓此方出仲景

金匱極妙

保生圓

入月後服產前產後一切諸疾悉治

金釵石斛壹分

別杵

秦椒

去目炒

官桂

去皮不見火剉

貝母

剉去心

乾地黄

洗乾

防風

剉去蘆

糯米

甘草

剉炒

大麻仁

去殼

大豆卷

黑豆牙是乾晒之

黄芩

剉各貳分

石膏

明淨硬者

麒麟竭

沒藥

去石

龍腦各壹錢半

右件藥並須用州土上等好者擣爲細末以熟蜜陸兩入水壹分同煉令水盡和藥了却入臼內杵伍百下取

出平分柒拾貳圓每服壹圓產前產
後血風頭旋身戰薄荷酒下月信不
通當歸酒下赤白帶下溫酒下臨產
難產胎衣不下子死腹中橫產倒生
死絕不語但看心頭熱氣在取壹圓
京棗湯化開灌入喉中立甦產後惡血
不盡臍腹疼痛嘔吐發熱增寒煩悶
月候不調或多或少皮膚虛腫惡露
不止虛勞中風口噤不語半身不遂

產前產後赤白痢大便秘澀血渴血
暈狂語見鬼頭痛面色痿黃漸成勞
瘦飲食無味並用溫酒研下催生當
歸酒下產後中風血暈生地黃汁同
煎十沸研藥灌口中禦風但五日壹
服空心熱酒嚼下浴後溫酒嚼下中
風不語身急如板用消梨穰薄荷同
研藥灌口中候汗出了相次揭衣被
當風坐卧立瘥其餘一切諸疾並用

當歸薄荷酒研下清酒亦得小兒天
弔驚風用藥壹圓分作叁服薄荷酒下

五積散

臨產時服
助氣催生

蒼朮貳拾兩

桔梗拾兩

去蘆

陳橘皮陸兩

去穢

白芷

去苗

甘草

炙

各叁兩

當歸貳兩

去蘆
洗切焙

芎壹兩半

洗剉

芍藥

白者
剉

白茯苓

去皮
剉

半夏

湯洗

各壹兩

麻黃

春夏貳兩
秋冬叁兩

枳殼肆兩

麩炒去
穢別杵

肉桂

春夏參兩
冬肆兩
別梓

厚朴貳兩

薑炙
別梓

乾薑

春夏壹兩半
秋冬貳兩

右拾伍味爲麤末分作陸分大鍋內

煖火炒令微赤香熟即止不可過焦

取出以淨紙板藉上攤令冷入枳殼

肉桂厚朴三物和之若產婦難產經

三兩日不生胎死腹中或產母氣乏

委頓產道乾澁用藥末貳錢加順元

散壹錢水柒分酒參分煎至柒分相

繼兩服氣血內和即產胎死者不過
參服當下其順元散亦須量產婦虛
實用之

又方

只用五積散貳錢入附子末壹錢水
壹盞同煎至柒分無順元散則用此
順元散

烏頭貳兩

炮烈切片

附子

炮去皮臍切片

天南星

炮

各壹兩

木香半兩

懷乾

右為末入前五積散同煎服

催生神効聖功散

此藥極滑胎易生其藥煎出婦人多可愛

喫切須令強服
崔生累得効

榆白皮

取深大根刮去赤皮取粉
紅色者去心薄切焙乾秤

滑石各壹兩

沒藥半錢

研

當歸壹分

去蘆洗切

朱砂半錢

別研

右件為細末次入朱砂再研和勻每服貳大錢水茶分盞煎參兩沸及九箇月以來方可服如臨產覺陣痛亦

依前服自服此藥忌登高厠

催生安胎救命散

烏藥肆兩

別用醋炒黃色

前胡半兩

揀淨

菊花壹兩

去梗

蓬莪茂貳兩

炮乘熱斫碎

當歸半兩

去蘆頭洗切焙

右剉碎用好米醋炒乾爲度同爲末如死胎在腹用炒薑豆淋酒調藥參錢連進參服立下死血衝心炒薑豆淋酒下貳錢入童子小便半盞安胎

用熱酒下壹錢血山崩熱酒下壹錢
產後一切血疾皆可服尋常催生用
炒薑豆淋酒調參錢只壹兩服立生
藥須用新磁罐收勿令失氣味
神効催生丹

臘月兔腦髓壹枚

麝壹錢別研

乳香末壹分

須黃明者乳鉢內研細末外以冷水浸鉢輕研

母丁香壹錢

為末須辛辣如荔枝核大者佳不可用陳者

右一處研細用兔腦髓為圓如○此

大慢火焙乾磁合收封糊合口不要
出氣候產婦陣頻以溫丁香湯吞下
壹圓產婦不痛其子順生男左女右
手把藥出急洗藥焙令乾凡壹粒可
用三次合時勿令鷄犬婦人孝子見
服時婦人閉目取藥產婦閉目吞之
神効

催生如聖圓

乳香

研好明淨者

右以生猪心血和圓如梧桐子大覺
腹痛時濃煎茅香湯下參拾圓嚼破
服端午日合切忌婦人鷄犬見橫倒
生只壹服此方絕妙

產後諸方

勝金湯

才產了便服去
惡血止血暈

地黄汁貳分

生

生薑汁壹分

生

右用童子小便壹分同煎拾餘沸溫
服地黄生薑須是淨潔沙盆內研取

自然汁切不可犯生水

又方

治血暈至急

生地黄參兩

碎切

生薑參兩

切碎不去皮

右貳物相和同炒乾碾爲末每服貳錢研木香酒壹盞同煎三兩沸通口服壓下血立愈

又方

產後血暈欲死及餘血不盡被風吹即變成寒熱

生地黄肆兩 生薑肆兩

右並薄切新瓦乾之爲細末溫酒調

下貳錢此二方俱妙

漬小便方

此小便難喫用法漬之

烏梅伍箇

湯內洗淨

炙了甘草末貳錢

炮了乾薑末壹錢

右參味先於椀內用沸湯少許浸少時候烏梅軟即以熱小便壹盞許就椀內浸令產婦閉氣作壹服服之如欲再服即別用烏梅等一依前法重浸方可服不可更用浸了藥也若產

婦才分娩了即須以童子小便依尋常與之未可用此法第二次方可用此法

燒鹽法

初食鹽用此法燒之

好淨鹽不拘多少

右以蒻葉裹作粽子樣於炭火內燒候鹽通紅如火即取出放淨地上一伏時候火氣盡研用

百草霜散

產後血暈可服

百草霜壹錢

秤即鍋底上黑煤也

生薑貳錢

秤去皮切炒乾

薑黃半錢

右爲末以生地黄煮濃汁調下貳錢又方

劉寄奴壹握

剉

甘草半兩

炙剉

右以水壹碗半煎柒分去滓服才覺血暈喫壹服甚者再服無事覺腹痛即先煎下恐緩急煎不成也

黑散子

治療見產後諸證用藥門

琥珀

別研細

朱砂

別研

京墨

煨通赤放冷用

血苗灰

即鯉魚鱗灰也

新羅白附子

炮烈

百草霜

乃鍋底上黑煤也

黑衣

即竈額上煤也倒掛者亦得又謂之烏龍尾鹽黃灰亦得

各半兩

麝

別研極細

白殭蠶

坐炒去絲紫

川當歸

洗去蘆須切焙

各壹分

右為末每服貳錢炒薑溫酒調下

烏金散

產後血暈或惡露不盡死胎不下並可服

大豆

生薑各肆兩

蓬莪茂

劉

當歸

去蘆須洗切焙

黃連

去須

各壹兩

椶皮貳兩

右先下生薑大豆炒候薑乾即下當歸莪黃連炒看豆紫色透心即以椶皮點火入藥銚中椶皮盡成黑灰即傾地上以紙襯出火毒為末每服貳錢童子小便調下產後雖無事服之亦佳

金黃散

產後惡血攻心發燥可服

蒲黃半兩

隔紙炒

延胡索壹兩

劉

桂心壹分不見

右為細末每服壹錢用烏梅湯放冷

調下

麒麟竭散產後惡血攻心漸

麒麟竭壹兩為末生薑半兩切碎

右用酒壹盞同煎至捌分去滓帶熱

通口分兩服立驗

千金散產後惡物不下或

桂心去皮不葳靈仙鐵腳者

白芷去蘆剉

當歸去蘆頭洗切焙

牡丹皮剉各壹兩

右同杵為細末每服貳錢煎神麴湯

調下

地黃散產後惡物不盡腹痛可服

熟乾地黃壹兩略炒

生薑肆兩細切如蠅頭大於銀器或銅器或新瓦上炒令黑焦煙起

為度半兩當歸壹兩洗去蘆頭切焙

右同杵為細末每服壹大錢用生薑

炒寔小便調下

牡礪散

產後惡露不絕可服

牡礪半兩燒

龜甲半兩

用灸黃好醋

右為細末每服溫酒調下貳錢食後服

桃仁散

產後心腹痛可服

桃仁貳錢

去皮尖并雙人炒黃秤

蓬莪茂壹錢半

秤用慢火炮取出乘熱鏽碎

桂心貳錢

不見火剉

當歸肆錢

去蘆頭剉焙秤用

右為細末熱酒調下壹錢如不喫酒

只用水壹中盞藥末貳錢煎柒分帶

熱服

川芎散

產後心腹
痛可服

川芎

洗坐

桂心

不見
火剉

木香

剉懷
乾

當歸

去蘆須
洗坐焙

桃仁

去皮尖并
雙仁炒黃

各壹兩

右爲細末每服壹錢熱酒調下如不
欲飲酒即用水壹盞藥末貳錢煎至
柒分帶熱服不拘時候

金花散

產後血暈一切腹痛不以虛實可服

薑黃

片子剉

熟乾地黄

焙

各貳兩

肉桂

去麤皮不見火

牛膝

去根酒浸一宿剉碎焙乾用

劉寄奴

剉

虎杖

洗剉

芎藭

洗剉

赤芍藥

剉碎

蒲黃

隔紙炒

乾葛

勿用色黑者

各壹兩

右爲細末每服貳錢如疾勢輕者即以水或酒用壹盞煎至柒分和滓溫服重急者以豆淋酒同煎服

當歸散

產後痢可服

官桂半兩

去皮秤用生薑貳兩取自然汁塗灸令薑汁盡為度

當歸壹分

去蘆須洗切焙

右為細末每服貳錢米飲調下未止

再服

人參散

產後虛汗發熱可服

人參

切片去蘆作片子焙

當歸

淨洗去蘆切焙

各半兩

右分作兩服每用猪石子壹隻切作捌片以灰去血水用水貳盞蒸貳莖

粳米壹合生薑參片煎壹盞去石子
等溫服早晚各壹服

四神散

產後血氣心
腹痛可服

當歸

去蘆須剉
洗焙乾用

芍藥

白者
剉

川芎

剉

各壹兩

乾薑半兩

炮烈
剉

右為細末每服貳錢熱酒調下

香桂散

產後臍下疼
痛不止可服

當歸

去蘆須
洗焙

川芎

剉

各壹分

官桂半兩

去皮不
見火剉

右為末分作叁服每服酒壹盞煎叁
五沸更入小便少許同煎至柒分溫
服甚者再服必効如不欲入酒即以
水代之

當歸散

婦人產後血氣血刺血暈血崩惡露不止或虛或腫或見神鬼

或如中風或瀉或痢或如瘡疾者其功効如神兼治產後一十八病唯瀉或喘本方不治

肉桂

去麤皮不見火

當歸

去蘆須酒洗焙

芍藥

白者剉

乾薑

炮烈

乾地黄

湯洗剉焙乾

蒲黃

隔紙炒

甘草

炙

各壹兩

黑豆貳兩

炒熟去皮

右為細末溫酒調下貳錢日進叁服不拘時候甚者叁服愈常服日兩服或壹服

柿湯

產後嘔逆氣亂心煩可服

乾柿壹箇切碎水壹大盞煮熟熱呷甚妙溫即再煖令熱呷喫

荆芥散

治產後一切難治之疾

荆芥不以多少

右爲細末每服壹錢或貳錢溫酒調下立効有急疾及風候宜速爲之此方絕妙家中常用之產婦雖無病每日進壹服只用童子小便調下有急疾用小便酒各半調之尤佳

陳梅散

產後痢可服

多年白梅不以多少

右燒成灰存性研爲細末陳米飲調下壹大錢甚妙

難產諸方

治產難子死腹中又姪兩兒壹生腹中壹死腹中死者出生者安此方神驗萬不失一

蟹爪壹升約伍兩

甘草肆兩

剉炙

阿膠叁兩

用蛤粉炒

右以東流水壹斗先煮貳味至叁升即內膠膠洋頓服之不能一頓服者食頃再服若至困灌之即活作東向

竈葦薪煮之

此方與前蟹爪湯相犯唯不用桂心

治難產

榆白皮壹升

切

瞿麥

揀淨

木通

剉

各叁分

牛膝

去苗根酒浸壹宿剉焙乾用

大麻仁

去殼

各壹兩

右爲麤散每服肆錢水壹中盞煎至陸分去滓溫服頻服佳

又方

當歸貳兩

去蘆須洗切焙

芍壹兩

剉

右爲麤散每服肆錢水酒各半中盞煎至陸分去滓溫服頻服佳若慮胎在腹已死者服此藥胎死即下胎活即安神効

又方

赤小豆壹合

炒略

黃明膠壹兩

剉

右以水壹盞煮豆令熟去滓內膠令消溫溫頓服

又方

取馬嚼壹枚覺痛即令產婦左手
把之甚効

又方

取東引槐枝手執之

又方

取桃仁分破書壹片作可字壹片
作出字依前還合令母吞之即產
此天真法也神効

又方

子母
早生

子母
早晚

右收五方氣飲氣書二道用茅香湯
吞之

又方

取草麻子肆粒去殼水研取汁少
許塗產婦脚心中才產便洗却并
貼臍中亦良

又方

取皂角末少許吹母鼻中令嚏其

子便下

又方

取大豆一顆擘破書其夫姓名於上以酒吞之

又方

雄虵蛻一條大者以頭按產婦臍中自腰後左繞轉却以尾按臍中才匝便下此法極驗虵蛻在高處者爲雄在地者爲雌須頭尾全者

逆產諸方

治逆產

半夏

湯洗七遍
去滑焙乾

白欬各壹兩

右爲細末每服貳錢生薑酒調下難
產壹服橫產貳服倒產叁服兒死肆
服若胎衣不下母氣欲絕亦宜服之
每壹服如人行壹里再進如瞿麥貳
兩尤妙小產只壹服愈

又方

急以鹽和輕粉塗于脚底又急以
小針刺子脚底即轉覺痛驚製入
即順出

又方

以鹽摩母腹即順出

又方

當歸不以多少微炒

去蘆鬚
洗剉焙

右爲細末溫酒調下貳錢

又方

艾葉壹兩

炒

右以酒壹大盞煎至陸分去滓分作兩次溫服立効水煮亦得

又方

車前子不以多少

右爲細末溫酒調下貳錢

又方

兔絲子不以多少

右爲細末溫酒調下壹錢

又方

以手中指取金下墨交畫子足即
順生

橫產諸方

葵子貳合

黃明膠坐

滑石末各壹兩

右爲細末以水壹大盞半煎至壹盞
去滓分作叁服溫服

又方

逆產橫產難產胎瘦姙娠產前
後虛損月候不調崩中皆可服

百草霜

香白芷各壹兩

右件爲細末每服貳錢童子小便壹茶脚許調勻以沸湯肆伍分化開服止壹服甚者再服愈

又方

橫產逆產胎死腹中及胎衣不出母欲絕皆可服

半夏

熱湯寢洗七遍去滑焙乾

白欬

剉碎

瞿麥頭子各半兩

右爲細末每服貳錢炒生薑酒調下

又方

瞿麥壹兩

右以水壹大盞煎至陸分去滓分作
兩服溫服

又方

牛尿不以多少

右塗母腹上即順出

又方

蛇脫皮不以多少

右用炭火燒作灰研令極細溫酒下

貳錢若子死腹中服之立下

胎衣不下諸方

產婦臨產先脫常着衣裳一件覆竈頭即無胎衣不下之厄此法極驗不可不信也

治胎衣不下

大牛膝壹兩

去苗

葵子壹合

右搗碎以水壹大盞煎至半盞去滓兩服溫服

又方

繫罽毼燒灰酒半升調下

又方

飲洗兒水壹口立下

又方

革麻子叁粒

鼠粘子壹分

即牛蒡子

右爲細末若子死腹中無藥可下即以醋糊調藥塗在口上以紙貼之立下

又方

當歸壹兩

洗去蘆須切焙乾

瞿麥

揀淨

芎藭

洗

各叁分

右為麤散以水及米醋各壹中盞煎至壹盞分作叁服溫服

又方

當歸

洗去蘆須切焙乾

鼈甲

酥塗炙令黃

各叁分

右為細末先取產多婦人髮半兩燒為灰細研入當歸末以水壹大盞半煎取捌分然後下盡鼈甲末煎伍柒

沸分爲叁服若數日不產子死腹中者皆可服服後如人行四五里再服又方

水銀壹彈子大

右斡開產婦口灌之扶起令坐不食頃扶起令倚立其子即下唯臨產面青舌赤沫出欲死子猶不出并產婦已死而欲令子出者可服

治產前產後痢疾

癩蛇蛟端午日收窖乾

右產前痢用前兩脚產後痢用後兩脚燒灰存性爲末米飲調下食前服此藥家中累曾經驗神効

許學士產科方 名叔微字知可

滑胎枳殼散

商州枳殼貳兩

去穢剉作小塊麩炒

甘草壹兩

剉炙

右爲末每服貳錢百沸湯點服空心食前日參服凡懷孕六七月以上即

服令兒易生初生胎小微黑百日以
後肉漸變白此雖孫真人滑胎易產
方然抑陽降氣爲衆方之冠

內補圓治姙娠衝任脉虛補血安胎

熟乾地黄貳兩

剉焙

當歸壹兩

去蘆須
洗焙乾

右細末煉蜜和圓如桐子大每服叁
肆拾圓溫酒下無時

上三方諸集皆載之在人用之如何爾
大率婦人姙娠唯在抑陽助陰素問云

陰搏陽別爲之有子蓋關前爲陽關後爲陰尺中之脉按之搏手而不絕者姙子也婦人平居陽氣微盛無害及其姙子則方閉經隧以養胎若陽盛搏之則經脉妄行胎乃不固素問所謂陰虛陽搏謂之崩也抑陽助陰之方甚多然胎前藥唯惡露若陰陽交雜別生它病唯是枳殼散所以抑陽四物湯所以助陰故爾枳殼散差寒若單服之恐有胎

寒腹痛之疾以內補圓佐之則陽不至
強陰不至弱陰陽調勻有益胎嗣此前人
未嘗論及也

人木香圓治婦人有孕傷食

木香貳錢

剉

京三稜

慢火煨乘熱剉作片子

人參

去蘆切片焙

白茯苓各叁錢

右細末麵糊圓菜豆大每服叁拾圓
熟水下

人白朮散治妊娠氣不和調飲食

白朮

切作片子焙乾

乾紫蘇各壹兩

白芷

微炒

人參

去蘆

各叁分

川芎

洗剉

訶子皮

青皮

去白

各半兩

甘草壹分

炙剉

右細末每服貳錢水壹盞薑叁片煎

柒分不拘時溫服之

經云飲食自倍腸胃乃傷又云陰之所生本在五味陰之五宮傷在五味若任

子飲食不節生冷毒物恣性食噉致脾胃之疾故妊娠傷食難得藥唯此二方最穩

人紫蘇飲治妊娠胎氣不和懷胎近上脹滿疼痛謂之子懸兼治臨產驚恐氣結連日不下

紫蘇莖葉壹兩

大腹皮

剪碎

人參

去蘆切片

川芎

劉開

陳橘皮

去白

白芍藥各半兩

當歸參分

云蘆須切

甘草壹分

炙

右細剉分作叁服每服用水壹盞半
生薑肆片葱白柒寸煎至柒分去滓
空心服之

曾有婦人累日產不下服遍催生藥不
驗予曰此必坐草太早心懷下一懼氣
結而然非順不順也素問云恐則氣下
蓋恐則精却却則上焦閉閉則氣還還

則下焦脹氣乃不行矣得此藥壹服
產及婦人六七月子懸者不用此數數
有驗不拾服胎便近下也

下死胎方

桂末貳錢麝香當門子壹箇同研
煖酒服須臾如手推下比之用水
銀等此藥不損血氣

琥珀散治婦人月經壅滯每發心腹
臍疔痛不可忍及治產後惡露不快血

上 愴心迷悶不省氣絕欲死

荆三稜

蓬莪朮

赤芍藥

劉寄奴

牡丹皮

官桂

削去皮不見火
令礮爲末後入

熟乾地黄

剉焙

菊花

揀去
枝梗

真蒲黃

當歸

去蘆頭
焙乾秤

各壹兩

右前伍味用烏豆壹升生薑半斤切片
米醋肆升同煮豆爛爲度焙乾入後
伍味同爲末每服貳錢溫酒調下空

心食前服一方不用菊花蒲黃用烏藥玄胡索亦佳予家之秘方也若是尋常血氣痛只壹服產後血衝心貳服便下常服尤佳予前後救人急切不少此藥易合宜多合以救人

佛手散治婦人妊孕五七月因事築磕著胎或子死腹中惡露下疼痛不已口噤欲絕用此藥探之若不損則痛止子母俱安若胎損立便逐下此藥催生

神妙

當歸陸兩

洗去蘆
切片焙

川芎肆兩

劉略
炒

右麤末每服參錢水壹小盞煎候相
次欲乾投酒壹大盞止壹沸去滓溫
服口噤灌之如人行五七里再進不
過參兩服便生有一方云此藥治傷
胎去血多崩中去血多金瘡去血多
拔齒去血多昏運欲倒者去水煎服
愈風散治產後中風口噤牙關緊急手

足瘕瘕

荆芥穗輕焙過壹兩

右爲細末每服貳錢溫酒調下

經驗產寶皆有之陳選方中用舉卿古
拜貳味蓋切脚隱語以秘之也此藥委
有奇効神聖之功大抵產室但無風爲
佳不可衣被帳褥太暖太暖即汗出汗
出則腠理開易於中風便昏冒記有一
婦人產後遮護太密閤內更生火睡久

及醒則昏昏如醉不省人事其家驚惶
醫用此藥佐以交加散祝云服之必睡
睡中必以左手搔頭覺必惺果如其言
交加散治婦人榮衛不通經脉不調腹
中撮痛氣多血少結聚爲癥產後中風
生地黃伍兩研取汁生薑伍兩研取汁
右交互用汁浸滓壹夕各炒黃漬汁
盡爲度末之尋常腹痛酒調下參錢
產後尤不可關

蒲黃散治產後出血太多虛煩發渴
真蒲黃末每用貳錢以米調飲下
渴躁甚者新汲水調下

護胎方治姙娠時氣身大熱令子不落
伏龍肝爲末水調塗臍下貳寸乾
則易瘥即止又取井中泥塗心下
乾則易

又方

浮萍

乾者

川朴消

蛤粉

大黃

劉碎
微炒

藍根各壹兩

劉碎

右爲末水調封臍上安胎解煩熱

麻仁蘇子粥治婦人產後有三種疾
鬱冒則多汗汗則大便秘故難於用藥
唯此粥最佳且穩

鹿屑湯治姙娠熱病胎死腹中

鹿角屑壹兩水壹碗葱白五莖豆
豉半合同煎至六分去滓溫分貳

服極妙

治婦人生產數日而下及胞衣死胎不下者方

用草麻柒粒去殼研如泥塗足心
纔下便急洗去此崔元亮海上方
人但未知爾政和中壹鄉人內子
產二日不下予令謾試之一塗俄
頃便下自後常用極驗

衛生家寶產科備要卷第六